

## DECLARACIÓN DEL PROFESORÁU DE LINGUA ASTURIANA Y GALLEGO-ASTURIANU

El profesoráu de Llingua asturiana, aconceyáu'l martes 15 de xineru nel IES Aramo d'Uviéu quier manifestar a la opinión pública les siguientes cuestiones:

- Cola publicación del segundu anteproyectu de reforma educativa, que divide a les asignatures en tres grupos, “troncales”, “específiques” y “d'especialidá”, nin la Llingua Asturiana nin el Gallego-Asturiano tienen posibilidá de caltenese nel sistema educativu. Nuevamente, la falta d'estatus d'oficialidá de la Llingua supón una torga pala so presencia y el so desarrollu normalizáu na sociedá.
- Esti retrocesu del principal padremuñu cultural d'Asturies tien repercusiones pergraves nel ámbitu educativu. Dempués de 30 años d'implantación curricular, onde la población asturiano exerció'l derechu a estudiar la so llingua, atópase cola imposibilidá de seguir faciéndolo, emprobeciendo'l conocimientu d'elementos fundamentales de la so cultura. Supón, amás, un incumplimientu de la Carta Europea de les Llingües Minorizaes, roblada pol Reinu d'España, y entraría en contradicción col propiu Estatutu d'autonomía asturianu.
- Les repercusiones a nivel llaboral, dau'l contestu económicu, nun necesiten munches esplicaciones: nestos momentos alrededor de 230 profesores que tán poniendo clase d'Asturiano y Gallego-asturianu na rede pública quedaríen ensin trabayu. Profesores que, hasta agora, vienen exerciendo la so función nunes condiciones enforma revesoses y precaries.
- Por too ello desiximos al Gobiernu asturianu, non solo qu'utilice tolos medios necesarios pa camudar l'actual redacción del anteproyectu de llei, sinón qu'acabe cuanto primero con esta situación que caltién a la llingua nun estatus de segundu orde declarando la oficialidá y criando la especialidá de Llingua Asturiana nel Sistema Educativu.

¡ASTURIANU OFICIAL YA!

Uviéu, 15 de xineru de 2013